

I Crisc, testamonesc de l'art e de la fe de nesc veies

Per endrez del Grop de Folclor de Soraga presciapech 50 esemplares del Crist su la Crousc é da poder veder te sala de Comun dute le sere ensin ai 16 de aost



Valch component del grop de folclor con le autorità a l'inaudazion de la mostra.

Soraga - L Grop de Folclor de Soraga no l'é n grop da bal, ma na sociazion che vel tegnir sù le tradizion e la cultura popolar te duc si aspec, e anter chisc, apede ai guanc, l'é ence le esprescion de fe e art che da semper se troa te le ciase de noscia jent, descheche l'é apontin i Crisc.

Pean via da chesta idea l Grop de Folclor de Soraga, con a cial Michele Decrestina, à tout sù con gran gaissa e piajer l'idea de endrezar via per chest istà a Soraga na mostra dalbon particolare: l'esposizion te Ciasa de Comun di bie Crisc che amò anchecondi fasc bela parbuda te n muie de stue de la jent del paìsc, esprescion sciantiva de fe popolar e da spes ence ejempies de aut valor storich o artistich.

L merit maor de chesta bela scomenzadiva l'é de Bepin Brunel, che à abù e portà dant la bela pissada e l se à ence dat jù n muie per jir fora per le ciase de la jent a veder e binar ensem la òpere da

meter fora. La jent da Soraga no se à fat prear: béleche na cincantina l'é i Crisc che l'é stat metù a la leta. Duc é stac fotografé te soa posizion originala da Marcello Chiocchetti, e per ogneun l'é stat enjignà na scheda con l'nom del patron, de l'autor se cognosciù, e la data per chel tant che l'é stat possibol la troar fora.

L'esposizion te sala de Comun de Soraga, fornida con doi bie cassabenc veies, valorisea dalbon le opere: Crisc desferenc, gregn e picoi, veies ensin del 1600 o fac da pech, de autor descognosciù o de artisè de inom desche per ejempie Tita Pederiva. Crisc che se porta dò storie veiore, no se sà se vere, ma dalbon enteressante, desche chel olache su la Crousc l'é stat depent de picoi puntolins rosc, somea per ricordar la pest del XVI centenè.

Sui parees de ogne majon de Fascia no l'é mai mencià amàncol n Crist - à recordà l Grop de Folclor a l'inaudazion stata en sàbeda

passada - e chel tel cianton de stua, l più gran e bel, l'era de spes na vera opera d'art, ma te la gran fe e devozion de nesc veies l fajea part de la "normalità", tant da no vegnir nience vardà e considrà per l valor de l'opera en se.

"Anchecondi, se se rua te le ciase de paesegn - disc Bepin Brunel - l'é de spes te ocasion pech piagéole o per mestieres, e no se se tol l temp de ge vardar a chisc bie ejempies de devozion. Per chest aon volù ge dar l met a duc, a chi del paìsc ma ence a chi che vegn da fora, de poder veder duc ensem aon apede l'auter chisc bie Crisc che l'é te nosce majon."

N gran devalpai da part del Grop de Folclor ge é stat sport tel cors de l'inaudazion a duc chi che se à dat jù percheche la scomenzadiva posse garatar dalvers, a duta la jent che à emprestà si Crisc e a l'aministrazion che à arseguà ence chest'outa na bona colaborazion. L salut e l ringraziament de cher al Grop de Folclor per chesta bela



Na bela esposizion te sala de Comun valorisea i Crisc de la jent de Soraga.

mostra é stac porté da l'ombolt de Soraga Roberto Pellegrini e dal conseier Ladin Luigi Chiocchetti. "L'é dassen bel - à dit Chiocchetti - veder che n grop de Folclor, e soraldut n grop fat per gran part da jent joena, endreza scomenzadive tant bele per valorisar noscia cultura e per ge far onor a nesc veies."

N intervent più leà a la fe é ruà da don Erminio Vanzetta: "Se spera che ence anchecondi e tel davegnir te nosce majon sie semper post per n Crist. E no demò te le majon, ma ence ti lesc publiche. Ence se te chisc tempes zachei disc che se cognessa i tor demez per no ge far

tort a chi che rua da dalonc e i é de autre religion - à dit amò l preve de Soraga - gio crese che a chela jent ge dae più dempaz noscia indifferenza e nosc tratament te si confronc, che n Crist tacà sul parei."

Endana aboncont de segur te Sala de Comun de Soraga l bel gran Crist che era stat tout demez dal Capitel de Molin seghitarà a restar tacà fora per n gran pezo, e per merit del Grop de Folclor de Soraga ensin ai 16 de aost entornvia sarà ence duc i etres Crisc de la jent de Soraga, e se podarà jir a i veder ogne sera, da les 8 ensin mesa les 11. (lg)